



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL

Komunikadu Imprensa

05 Marsu 2013

Artigu 285 Kódigu Penál perigozu ba dezvoltimentu demokrasia iha Timor Leste

Iha 28 Feveiru 2013 Tribunál Distrital Díli julga arguidu nain tolu inisial MS, RO, OS ne'ebé mak Ministériu Públiku akuza komete krime denuncia kalunioza hasoru lezadu JBS. Krime ne'e akontese iha 31 Dezembru 2011 no 2 Janeriu 2012, bainhira arguidu sira ne'ebé nu'udar jornalista publika sira nia artigu iha Diario Suara Timor Lorosa'e (STL) no Jurnal Independente

Ministériu Públiku akuza arguidu sira komete krime denúnsia kalunioza tuir artigu 285 Kódigu Penál,

tanba publika artigu ida iha Diariu STL no Independente, ne'ebé diskonfia iha indikasaun involve Ministériu Públiku Distritu Oe-Cusse ba kazu asidente viasaun. Kazu ne'e kontese iha 18 Outubru 2011 iha Oecusse. Asidente ne'e rezulta família na'in tolu husi arguidu MS lakon sira nia vida (mate) no sofre kanek todan.

Audiénsia ne'e realiza hodi rona deklarasaun husi arguidu na'in tolu nune'é bele produz prováz materiál relasionadu ho arguidu sira ninia publikasaun iha jurnal rua ne'e.

“JSMP hanoin katak provizaun kona-ba denuncia kalunioza ne'ebé hatur iha Kódigu Penál Timor Leste ne'e sei estabelese presendente perigozu no amiasa ba demokrasia iha Timor Leste tanba sei taka ema nia ibun atu divulga indikasaun prátika abuzu poder sira ne'ebé involve autoridade estadu nian,” dehan Diretor JSMP, Luis de Oliveira Sampaio.

JSMP hanoin katak mezmu artigu 285 Kódigu Penál la refere ba 'defamasaun', maibe implisitamente iha natureza ne'ebé hanesan ho conseitu defamasaun. Ne'e kontrariu ho obrigasaun Estadu Timor Leste nian tuir artigu 19 husi Paktu Internasionál kona-ba direitu sivíl no polítiku (ICCPR) no Artigu 41 Konstituisaun Timor-Leste hodi proteje ema nia direitu atu iha ninia opiniaun rasik la-ho interferénsia no liberdade ba espresaun. Estadu tenki halo balansiu entre protesaun ba ema nia reputasaun husi alegasaun fallsu no ema nia direitu ba espresaun, liuliu jornalista nia liberdade atu krítika instituisaun governu nian.

Iha audiénsia nia laran, arguidu na'in tolu admite katak akuzasaun ne'e balun loos balun la loos. Tanba ne'e sira defende sira nia aan ho argumentasaun no ho faktus. Arguidu MS kontra maka'as provaz data akuzasaun ne'ebé la loos iha akuzasaun. Arguidu ne'e mós apresenta ba tribunál faktus husi kronolójia husi kazu ne'ebé mak nia intrega ba arguidu RO no OS hodi publika iha sira nia jornál.

Kazu ne'e rejista ho Nú. Prosesu: 0201/2012/TDDIL. Prosesu julgamentu prezide husi juis singular Dr. Antonio Helder do Carmo, Ministériu Públiku, representa husi Dra. Ivonia Maria Guterres no arguidu sira hetan defeza husi Dr. Cancio Xavier no Dra. Laura Lay husi Defensoria Públiku.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Landline: 3323883 / 77810637
www.jsmp.tl